



SIARAN MEDIA

KEMENTERIAN PERALIHAN TENAGA DAN TRANSFORMASI AIR (PETRA)

INTERVENSI RM1 JUTA KURANGKAN GANGGUAN BEKALAN AIR, MANFAAT KEPADA 3,000 PELAJAR UMS

KOTA KINABALU, 14 Julai 2025 – Kerajaan Persekutuan melalui Kementerian Peralihan Tenaga dan Transformasi Air (PETRA) komited membantu Universiti Malaysia Sabah (UMS) dalam usaha untuk mengurangkan gangguan bekalan air melalui pelan intervensi jangka pendek melibatkan kos RM1 juta. Komitmen ini diumumkan YAB Dato' Sri Haji Fadillah bin Haji Yusof, Timbalan Perdana Menteri dan Menteri Peralihan Tenaga dan Transformasi Air semasa tinjauan PETRA Skwad di UMS, hari ini.

Pelan intervensi ini akan dilaksanakan melalui kerjasama antara Jabatan Bekalan Air (JBA), PETRA dan UMS. Pelaksanaan intervensi ini dijangka memberi manfaat secara langsung kepada lebih 3,000 pelajar, terutamanya di Kolej Kediaman Tun Mustapha dan Kolej Kediaman Tun Fuad yang sering terjejas akibat gangguan bekalan air.

Tindakan intervensi yang akan dilaksanakan adalah membina saluran agihan khusus bagi menyambungkan sumber air bawah tanah yang telah dibangunkan oleh UMS, menambah tangki air bawah tanah dengan kapasiti pertambahan sebanyak 0.13 juta liter sebagai usaha menambah bekalan air dan pemasangan kawalan injap automatik (*automated modulating valve*) sebagai langkah menstabilkan aras air dalam tangki servis UMS.

Seterusnya, bagi memastikan tekanan air mencukupi ke kawasan kediaman pelajar, JBA akan menyediakan pam penggalak (*in-line booster pump*) dari tangki servis ke Kolej Kediaman Tun Mustapha dan Kolej Kediaman Tun Fuad dengan menggunakan saluran *by-pass* sedia ada yang telah dibina oleh UMS. Kerja-kerja intervensi ini dijangka mengambil masa satu bulan dan boleh menyumbang kepada penambahbaikan operasi sistem bekalan air di UMS.

Kerajaan Persekutuan merakamkan penghargaan kepada Kerajaan Negeri Sabah, Kementerian Pengajian Tinggi (KPT), pengurusan UMS, Jabatan Bekalan Air PETRA, Jabatan Air Negeri Sabah (JANS) serta agensi-agensi teknikal yang telah memberi kerjasama dalam melaksanakan intervensi ini.

Kerajaan Persekutuan komited dalam memastikan kebajikan pelajar sentiasa menjadi keutamaan, sejajar dengan konsep Malaysia MADANI yang menekankan kemampanan, kesejahteraan dan keprihatinan terhadap keperluan rakyat.

KEMENTERIAN PERALIHAN TENAGA DAN TRANSFORMASI AIR
14 JULAI 2025

Unit Komunikasi Korporat | Kementerian Peralihan Tenaga dan Transformasi Air (PETRA)
Tel.: 03-8000 8000 | E-Mel: ukk@petra.gov.my

